



ATASSUT

UPA14/130-1

Knud Kristiansen

27.03.2014

Uunga siunnersuut: Sumiiffinni nunami aalajangersimasuni takornariartitsinermit akuersissuteqartarnissaq pillugu Inatsisartut inatsisaat nr. 19, 3. december 2012-imeersup allangortinnissaa pillugu Inatsisartut inatsisaat nr. xx, xx.xxx-imeersoq.

(Inuutissarsiornermit Aatsitassanullu Naalakkersuisoq)

Matumani Inatsisartut sumiiffinni nunami aalajangersimasuni takornariartitsinermit akuersissuteqartarnissaq pillugu Inatsisartut inatsisissaata allangortinneqarnissaanut siunnersuutip saqqummiunneqartup siullermeerneqarnerani ATASSUT-mit imaattumik oqaaseqarfigissavarput:

Sumiiffinni nunami aalajangersimasuni takornariartitsinermit akuersissuteqartarnissaq pillugu inatsip allangortinneqarnissaa ATASSUT-mit ilassilluarlugulu iluarisimaarparput.

ATASSUT-mit inuutissarsiornerup tungaatigut ineriartortitsiuarnissamik pingaartitsisuujuarnerannut siunnersuut maanna oqaluserisarput naapertuutilluinnarpoq minnerunngitsumillu aamma sutigut tamatigut sapinngisamik allaffissornikkut kiffartuussinikkullu eqaatsumik suleriaaseqarluni ingerlaaseqarnissaq eqqumaniarfigineqartuartariaqarpoq, tamannami eqqumaffiginngikkaanni aningaasat allaffissornerujussuarmik pisariaqanngikkaluartumik kinguneqaannarsinnaammat, tamannalu inuiaqatigiit aningaasaqarniarneranut sunniuteqangaatsiarsinnaasarluni.

Taamatut ATASSUT-mit oqaaseqareerluta iluarisimaarparput taamatut takornariartitsinermit ingerlatsinerup iluani eqqaannerusumik takornarissat aalisarsinnaanermik akuersissutisisinnaasalernissaat qulakkeerniarneqarmat.



ATASSUT-mittaaq aamma maluginiarparput inatsip allanngortinneqarnissaanut siunnersuutip tusarniaassutigineqarneranut atatillugu amerlanerusunik tamanna iluarisimaarneqarsimasoq, naak ICC-p tungaanniit Aalisarnermut Piniarnermut Nunalerinermullu pisorta qarfiup ataaniitiinnarneqarnissaa kissaatigineqarsimagaluartoq, taamaattorli pisorta qarfiup pineqartup tamakkiisumik tapersersornartinnerusimavaa Inuutissarsiornermut pisorta qarfiup ataanni inissisimanissaa, susasaqarfiup ataatsip iluaniilerlutik, tamannalu aamma ATASSUT-mit paasilluarlutigu taperserparput.

Taamaattorli inatsisip atuutilerfissaanut tunngatillugu ATASSUT-mit maluginiarparput inatsit manna akuerineqarpat Juulip aallaqqaataani ukioq manna atuutilersinneqartussatut inissinneqarsimammat, siunnersuummilu takusinnaasatsitit ersinngimmat tamanna sioqqullugu akuersissummik pissarsisimasut qanoq inissisimaffigineqassanersut, ATASSUT-mit Naalakkersuisut qinnuigissavagut tamatuma pineqartup arlaannaatigulluunniit aalisarluni takornariartitsisartunut aammalu akuersissuteqartunut kingunipiloqannginnissaa, piffissarmi inatsip atuutilerfissaa takornariartitsinerup iluani ulapaarnerpaaffiusarmat aammalu arlaatigut akunnattoortoqannginnissaa upalungaarsimaniarfigineqartariaqarmat.

Taamatut ATASSUT-mit oqaaseqarluta inatsisip allanngortinnissaanut siunnersuutip aappassaaneerneqartinnani Inatsisartut Inuutissarsiornermut ataatsimiitsitaliaannut aammalu pisariaqassappat ataatsimiititalianut allanut susasaqartunut oqaaseqaatigut aammalu kissaatigut ilanngullugit suliaangortinneqarnissaa innersuussutigissavarput.